

মেঘনাদবধ কাব্য মাইকেল মধুসূদন দত্ত

সপ্তম সর্গ

১৪ আগস্ট ২০০৬

(Last updated: ১৭ আগস্ট ২০০৬)

<http://www.iopb.res.in/~somen/madhu.html>

সপ্তম সর্গ

উদীলা আদিত্য এবে উদয়-অচলে,
পদ্মপর্ণে সুপ্ত দেব পদ্মযোনি যেন,
উর্মীলি নয়নপদ্ম সুপ্রসন্ন ভাবে,
চাহিলা মহীর পানে! উল্লাসে হাসিলা
কুসুম কুন্তলা মহী, মুক্তামালা গলে।
উৎসবে মঞ্জলবাদ্য উথলে যেমতি
দেবালয়ে, উথলিল সুস্বরলহরী
নিকুঞ্জ। বিমল জলে শোভিল নলিনী;
স্থলে সমপ্রেমাকাঙ্ক্ষী হেম সূর্যমুখী।

10

নিশার শিশিরে যথা অবগাহে দেহ
কুসুম, প্রমীলা সতী, সুবাসিত জলে
স্নানি পীনপয়োধরা, বিনানিলা বেণী।
শোভিল মুকুতাপাঁতি সে চিকণ কেশে,
চন্দ্রমার রেখা যথা ঘনাবলী মাঝে
শরদে! রতনময় কঙ্কণ লইলা
ভূমিতে মৃগালভূজ সুমৃগালভূজা;—
বেদনিল বাহু, আহা, দৃঢ় বাঁধে যেন,
কঙ্কণ! কোমল কণ্ঠে স্বর্ণকণ্ঠমালা
ব্যথিল কোমল কণ্ঠ! সম্ভাষি বিশ্বয়ে
বসন্তসৌরভা সখী বাসন্তীরে, সতী
কহিলা;—“কেন লো, সই, না পারি পরিতে

20

অলঙ্কার? লঙ্কাপুরে কেন বা শূনিছি
রোদন-নিলাদ দূরে, হাহাকার ধনি?
বামেতর আঁখি মোর নাচিছে সতত;
কাঁদিয়া উঠিছে প্রাণ! না জানি, স্বজনি,
হায় লো, না জানি আজি পড়ি কি বিপদে?
যজ্ঞগারে প্রাণনাথ, যাও তাঁর কাছে,
বাসন্তি! নিবার যেন না যান সমরে
এ কুদিনে বীরমণি। কহিও জীবশে,
অনুরোধে দাসী তাঁর ধরি পা দুখানি!”

30

নীরবিলা বীণাবাণী, উত্তরিলা সখী
বাসন্তী, “বাড়িছে ক্রমে, শূন কান দিয়া,
আর্তনাদ, সুবদনে! কেমনে কহিব
কেন কাঁদে পুরবাসী? চল আশুগতি
দেবের মন্দিরে যথা দেবী মন্দোদরী
পূজিছেন আশুতোষে। মত্ত রণমদে,
রথ, রথী, গজ, অশ্ব চলে রাজপথে;
কেমনে যাইব আমি যজ্ঞগারে, যথা
সাজিছেন রণবেশে সদা রণজয়ী
কান্ত তব, সীমন্তিনী?” চলিলা দুজনে
চন্দ্রচূড়ালয়ে, যথা রক্ষঃকুলেশ্বরী
আরাধেন চন্দ্রচূড়ে রক্ষিতে নন্দনে—
বৃথা! ব্যগ্রচিত্ত দৌহে চলিলা সঙ্ঘরে।

40

বিরসবদন এবে কৈলাস-সদনে
 গিরিশ। বিষাদে ঘন নিশ্বাসি ধূর্জটি,
 হৈমবতী পানে চাহি, কহিলা, “হে দেবি,
 পূর্ণ মনোরথ তব; হত রথীপতি
 ইন্দ্রজিৎ কাল রণে! যজ্ঞাগারে বলী
 সৌমিত্রি নাশিল তারে মায়ার কৌশলে!
 50 পরম ভকত মম রক্ষণকুলনিধি,
 বিধুমুখি! তার দুঃখে সদা দুঃখী আমি।
 এই যে ত্রিশূল, সতি হেরিছে এ করে,
 ইহার আঘাত হতে গুরুতর বাজে
 পুত্রশোক! চিরস্থায়ী, হয়, সে বেদনা,—
 সর্বহর কাল তাহে না পারে হরিতে!
 কি কবে রাবণ, সতি, শূনি হত রণে
 পুত্রবর? অকস্মাৎ মরিবে, যদ্যপি
 নাহি রক্ষি রক্ষি আমি রুদ্রতেজোদানে।
 60 তুমিনু বাসবে, সাধি, তব অনুরোধে;
 দেহ অনুমতি এবে তুমি দশাননে।”
 উত্তরিল কাত্যায়নী, “যাহা ইচ্ছা কর,
 ত্রিপুরারি! বাসবের পুরিবে বাসনা,
 ছিল ভিক্ষা তব পদে, সফল তা এবে।
 দাসীর ভকত, প্রভু, দাশরথী রথী;
 এ কথাটি, বিশ্বনাথ, থাকে যেন মনে!
 আর কি কহিবে দাসী ও পদরাজীবে?”
 হাসিয়া ঝরিলা শূলী বীরভদ্র শূরে।
 ভীষণ-মুরতি রথী প্রণমিলে পদে
 70 সাষ্টাঙ্গে, কহিলা হর,—“গতজীব রণে
 আজি ইন্দ্রজিৎ, বৎস। পশি যজ্ঞাগারে,
 নাশিল সৌমিত্রি তারে উমার প্রসাদে।
 ভয়াকুল দূতকুল এ বারতা দিতে
 রক্ষানাথে। বিশেষতঃ, কি কৌশলে বলী
 সৌমিত্রি নাশিলা রণে দুর্মদ রাক্ষসে,
 নাহি জানে রক্ষাদূত। দেব ভিন্ন, রথি,

কার সাধ্য দেবমায়া বুঝে এ জগতে?
 কনক-লঙ্কায় শীঘ্র যাও, ভীমবাহু,
 রক্ষাদূতবেশে তুমি; ভর, রুদ্রতেজে,
 নিকষানন্দনে আজি আমার আদেশে।”

80 চলিলা আকাশপথে বীরভদ্র বলী
 ভীমাকৃতি, ব্যোমচর নমিলা চৌদিকে
 সভয়ে; সৌন্দর্যতেজে হীনতেজাঃ রবি,
 সুধাংশু নিরংশু যথা সে রবির তেজে।
 ভয়ঙ্করী শূলছায়া পড়িল ভূতলে।
 গম্ভীর নিনাদে নাদি অম্বরশিপি
 পূজিলা ভৈরবদূতে। উত্তরিল রথী
 রক্ষণপুরে, পদচাপে থর থর থরি
 কাঁপিল কনক-লঙ্কা, বৃক্ষশাখা যথা
 পক্ষীন্দ্র গরুড় বৃক্ষে পড়ে উড়ি যবে।

90 পশি যজ্ঞাগারে শূর দেখিলা ভূতলে
 বীরেন্দ্রে! প্রফুল্ল, হয়, কিংশুক যেমতি
 ভূপতিত বনমাঝে প্রভঞ্জন-বলে।
 সজল নয়নে বলী হেরিলা কুমারে।
 ব্যাথিল অমর-হিয়া মর-দুঃখ হেরি।

কনক-আসনে যথা দশানন রথী,
 রক্ষণকুলচূড়ামণি, উত্তরিল তথা
 দূতবেশে বীরভদ্র, ভয়রাশি মাঝে
 গুপ্ত বিভাবসুসম তেজোহীন এবে।
 প্রণামের ছলে বলী আশীষি রাক্ষসে,
 100 দাঁড়াইলা করপুটে, অশ্রুময় আঁখি,
 সম্মুখে। বিশ্বয়ে রাজা শূধিলা, “কি হেতু,
 হে দূত, রসনা তব বিরত সাধিতে
 স্বকর্ম? মানব রাম, নহ ভৃত্য তুমি
 রাঘবের, তবে কেন, হে সন্দেশ-বহ,
 মলিন বদন তব? দেবদৈত্যজয়ী
 লঙ্কার পঞ্চজরবি সাজিছে সমরে

আজি, অমঞ্জল বার্তা কি মোরে কহিবে?
 মরিল রাঘব যদি ভীষণ অশনি-
 সম প্রহরণে রণে, কহ সে বারতা,
 110 প্রসাদি তোমারে আমি।” ধীরে উত্তরিল
 ছদ্মবেশী; “হায়, দেব, কেমনে নিবেদি
 অমঞ্জল বার্তা পদে, ক্ষুদ্র প্রাণী আমি?
 অভয় প্রদান অগ্রে, হে কর্বুরপতি,
 কর দাসে!” ব্যগ্রচিণ্ডে উত্তরিল বলা,
 “কি ভয় তোমার, দূত? কহ স্বরা করি,—
 শুভাশুভ ঘটে ভবে বিধির বিধানে।—
 দানিনু অভয়, স্বরা কহ বার্তা মোরে!”

বিরূপাক্ষচর বলা রক্ষোদূতবেশী
 কহিলা, হে রক্ষঃশ্রেষ্ঠ, হত রণে আজি
 120 কর্বুর-কুলের গর্ব মেঘনাদ রথী!”

যথা যবে ঘোর বনে নিষাদ বিধিলে
 মৃগেন্দ্রে নশ্বর শরে, গর্জি ভীম নাদে
 পড়ে মহীতলে হরি, পড়িলা ভূপতি
 সভায়! সচিববৃন্দ, হাহাকার রবে,
 বেড়িল চৌদিকে শুরে, কেহ বা আনিল
 সুশীতল বারি পাত্রে, বিউনিল কেহ।

বৃদ্ধতেজে বীরভদ্র আশু চেতনিল
 রক্ষাবরে। অগ্নিকণা পরশে যেমতি
 বারুদ, উঠিয়া বলা, আদেশিলা দূত-
 130 “কহ দূত, কে বধিল চিররণজয়ী
 ইন্দ্রজিতে আজি রণে? কহ শীঘ্র করি।”

উত্তরিল ছদ্মবেশী; “ছদ্মবেশে পশি
 নিকুণ্ডিলা যজ্ঞাগারে সৌমিত্রিকেশরী,
 রাজেন্দ্র, অন্যায় যুদ্ধে বধিল কুমতি
 বীরেন্দ্রে। প্রফুল্ল, হায়, কিংশুক যেমনি
 ভূপতিত বনমাঝে প্রভঞ্জন-বলে
 মন্দিরে দেখিনু শুরে। বীরশ্রেষ্ঠ তুমি,

রক্ষোনাথ, বীরকর্মে ভুল শোক আজি।
 রক্ষঃকুলাঙ্গনা, দেব, আর্দ্রিবে মহীরে
 চক্ষুঃজলে। পুত্রহানী শত্রু যে দুর্মতি,
 140 ভীম প্রহরণে তারে সংহারি সংগ্রামে,
 তোষ তুমি, মহেষাস, পৌর জনগণে!”

আচম্বিতে দেবদূত অদৃশ্য হইলা,
 স্বর্গীয় সৌরভে সভা পূরিল চৌদিকে।
 দেখিলা রাক্ষসনাথ দীর্ঘজটাবলা,
 ভীষণ ত্রিশূল-ছায়া। কৃতাজলিপুটে
 প্রণমি, কহিলা শৈব, “এত দিনে, প্রভু,
 ভাগ্যহীন ভৃত্যে এবে পড়িল কি মনে
 তোমার? এ মায়া, হায়, কেমনে বুঝিব
 মূঢ় আমি, মায়াময়? কিছু অগ্রে পালি
 আজ্ঞা তব, হে সর্বজ্ঞ; পরে নিবেদিব
 যা কিছু আছে এ মনে ও রাজীবপদে।”

সরোষে—তেজস্বী আজি মহারুদ্ধতেজে—
 কহিলা রাক্ষসশ্রেষ্ঠ, “এ কনক-পুরে,
 ধনুর্ধর আছ যত, সাজ শীঘ্র করি
 চতুরঞ্জে! রণরঞ্জে ভুলিব এ জ্বালা—
 এ বিষম জ্বালা যদি পারি রে ভুলিতে!”

উথলিল সভাতলে দুন্দুভির ধনি,
 শৃঙ্গনিবাদক যেন, প্রলয়ের কালে,
 বাজাইলা শৃঙ্গবরে গভীর নিনাদে।
 যথা সে ভৈরব রবে কৈলাস-শিখরে
 সাজে আশু ভূতকুল, সাজিল চৌদিকে
 রাক্ষস, টলিল লক্ষা বীরপদভরে।
 বাহিরিল অগ্নিবর্ণ রথগ্রাম বেগে
 স্বর্ণধ্বজ; ধূম্রবর্ণ বারণ, আক্ষফালি
 ভীষণ মুদগর শূণ্ডে, বাহিরিল হেষে
 তুরঙ্গম, চতুরঞ্জে আইলা গর্জিয়া
 চামর, অমর-ত্রাস; রথীবৃন্দ সহ

170 উদগ্র, সমরে উগ্র; গজবন্দ মাঝে
বাস্কল, জীমূতবন্দ মাঝারে যেমতি
জীমূতবাহন বজ্রী ভীম বজ্র করে!
বাহিরিল হুহুকারি অসিলোমা বলী
অশ্বপতি; বিড়ালক্ষ পদাতিকদলে,
মহাভয়ঙ্কর রক্ষঃ, দুর্মদ সমরে!
আইল পাতকীদল, উড়িল পতাকা,
ধুমকেতুরাশি যেন উদিল সহসা,
আকাশে! রাক্ষসবাদ্য বাজিল চৌদিকে।

180 যথা দেবতেজে জন্মি দানবনাশিনী
চণ্ডী, দেব-অস্ত্রে সতী সাজিলা উল্লাসে
অট্টহাসি, লক্ষাধামে সাজিলা ভৈরবী
রক্ষঃকুল-অনীকিনী-উগ্রচণ্ডা রণে।
গজরাজতেজঃ ভুজে; অশ্বপতি পদে;
স্বর্ণরথ শিরঃচূড়া; অশ্ল পতাকা
রত্নময়; ভেরী, তুরী, দুন্দুভি, দামামা
আদি বাদ্য সিংহনাদ! শেল, শক্তি, জাটি,
তোমর, ভোমর, শূল, মুষল, মুগ্ধর,
পট্টিশ, নারাচ, কৌন্ত — শোভে দন্তরূপে!
জনমিল নয়নাগ্নি সঁজোয়ার তেজে!
থর থর থরে মহী কাঁপিলা সঘনে,
190 কল্লোলিলা উথলিয়া সভয়ে জলধি;
অধীর ভূধররজ, —সীমার গর্জনে,—
পুনঃ যেন জন্মি চণ্ডী নিনাদিলা রোষে!

200 চমকি শিবিরে শূল রবিকুলরবি
কহিলা সম্ভাষি মিত্র বিভীষণে, “দেখ,
হে সখে, কাঁপিছে লক্ষা মুহূর্মুহুঃ এবে
ঘোর ভুকম্পনে যেন! ধুমপুঞ্জ উড়ি
আবরিছে দিননাথে ঘন ঘন রূপে;
উজলিছে নভস্তল ভয়ঙ্করী বিভা,
কালাগ্নিসম্ভবা যেন! শুন, কান দিয়া,
কল্লোল, জলধি যেন উথলিছে দূরে

লয়িতে প্রলয়ে বিশ্ব!” কহিলা —সত্রাসে
পাণ্ডুগুণ্ডদেশ—রক্ষঃ, মিত্রচূড়ামণি,
“কি আর কহিব, দেব? কাঁপিছে এ পুরী
রক্ষাবীরপদভরে, নহে ভুকম্পনে!
কালাগ্নিসম্ভবা বিভা নহে যা দেখিছ
গগনে, বৈদেহীনাথ; স্বর্ণবর্ম-আভা
অস্ত্রাদির তেজঃ সহ মিশি উজলিছে
দশ দিশ! রোধিছে যে কোলাহল, বলি,
শ্রবণকুহর এবে, নহে সিঞ্চুধনি,
গরজে রাক্ষসচমু, মাতি বীরমদে।
আকুল পুত্রেন্দ্রশোকে, সাজিছে সুরথী
লঙ্কেশ! কেমনে, কহ রক্ষিবে লক্ষ্মণে,
আর যত বীরে, বীর, এ ঘোর সঙ্কটে?”

সূয়রে কহিলা প্রভু, “যাও স্বরা করি
মিত্রবর, আন হেথা আহানি সস্বরে
সৈন্যাধ্যক্ষদলে তুমি। দেবশ্রিত সদা,
এ দাস, দেবতাকুল রক্ষিবে দাসেরে!”

শৃঙ্গ ধরি রক্ষাবর নাদিলা ভৈরবে।
আইলা কিঞ্চিন্ধ্যানাথ গজপতিগতি;
220 রণবিশারদ শুর অঙ্গদ; আইলা
নল, নীল দেবাকৃতি, প্রভঞ্জনসম
ভীমপরাক্রম হনু; জাম্বুবান বলী;
বীরকুলর্ষভ বীর শরভ; গবাক্ষ
রক্তাক্ষ, রাক্ষসত্রাস; আর নেতা যত।

সম্ভাষি বীরেন্দ্রদলে যথাবিধি বলী
রাঘব, কহিলা প্রভু, “পুত্রশোকে আজি
বিকল রাক্ষসপতি সাজিছে সস্বরে
সহ রক্ষঃ-অনীকিনী; সঘনে টলিছে
বীরপদভরে লক্ষা! তোমরা সকলে
ত্রিভুবনজয়ী রণে, সাজ স্বরা করি;
230 রাখ গো রাঘবে আজি এ ঘোর বিপদে।

স্ববন্ধুবান্ধবহীন বনবাসী আমি
ভাগ্যদোষে; তোমরা হে রামের ভরসা,
বিক্রম, প্রতাপ, রণে! একমাত্র রথী
জীবে লঙ্কাপুরে এবে; বধ আজি তারে,
বীরবৃন্দ! তোমাদের প্রসাদে বাঁধিনু
সিন্ধু; শূলীশঙ্খনিভ কুম্ভকর্ণ শূরে
বধিনু তুমুল যুদ্ধে, নাশিল সৌমিত্রি
দেবদৈত্যনরত্রাস ভীম মেঘনাদে!
240 কুল, মান, প্রাণ মোর রাখ হে উদ্ধারি,
রঘুবন্ধু, রঘুবন্ধু, বন্ধা কারাগারে
রক্ষঃ-ছলে! স্নেহপণে কিনিয়াছ রামে
তোমরা, বাঁধ হে আজি কৃতজ্ঞতা-পাশে
রঘুবংশে, দাক্ষিণাত্য দাক্ষিণ্য প্রকাশি!

নীরবিলা রঘুনাথ সজল নয়নে।
বারিদপ্রতিম স্বনে স্বনি উত্তরিল
সুগ্রীব; “মরিব, নহে মরিব রাবণে,
এ প্রতিজ্ঞা, শুরশ্রেষ্ঠ, তব পদতলে!
ভুক্তি রাজ্যসুখ, নাথ, তোমার প্রসাদে,—
250 ধনমানদাতা তুমি; কৃতজ্ঞতা-পাশে
চির বাঁধা, এ অধীন, ও পদপঙ্কজে!
আর কি কহিব, শুর? মম সঙ্গীদলে
নাহি বীর, তব কর্ম সাধিতে যে ডরে
কৃতান্ত! সাজুক রক্ষঃ, যুঝিব আমরা
অভয়ে!” গর্জিলা রোষে সৈন্যাধ্যক্ষ যত,
গর্জিলা বিকট ঠাট জয় রাম নাদে!

সে ভৈরব রবে রুষি, রক্ষঃ-অনীকিনী
নিনাদিলা বীরমদে, নিনাদেন যথা
260 দানবদলনী দুর্গা দানবনিনাদে!—
পূরিল কনক-লঙ্কা গভীর নির্ঘোষে!

কমল-আসনে যথা বসেন কমলা,
রক্ষঃকুলরাজলক্ষ্মী, পশিল সে স্থলে
আরাব; চমকি সতী উঠিলা সত্তরে।
দেখিলা পদ্মাফী, রক্ষঃ সাজিছে চৌদিকে
ক্রোধান্ধ; রাক্ষসধ্বজ উড়িছে আকাশে,
জীবকুল-কুলক্ষণ! বাজিছে গভীরে
রক্ষোবাদ্য। শূন্যপথে চলিলা ইন্দ্রিরা—
শরদিন্দুনিভাননা—বৈজয়ন্ত ধামে।

বাজিছে বিবিধ বাদ্য ত্রিংশ-আলয়ে;
270 নাচিছে অপ্সরারবৃন্দ; গাইছে সুতানে
কিম্বর; সুবর্ণাসনে দেবদেবীদলে
দেবরাজ, বামে শচী সূচারুহাসিনী;
অনন্ত বাসন্তানিল বহিছে সুস্বনে;
বর্ষিছে মন্দারপুঞ্জ গন্ধর্ব চৌদিকে।

পশিলা কেশব-প্রিয়া দেবসভাতলে।
প্রণমি কহিলা ইন্দ্র, “দেহ পদধূলি,
জননি, নিঃশঙ্ক দাস তোমার প্রসাদে—
গতজীব রণে আজি দুরন্ত রাবণি!
ভুক্তিব স্বর্গের সুখ নিরাপদে এবে।
280 কৃপাদৃষ্টি যার প্রতি কর, কৃপাময়ি,
তুমি, কি অভাব তার?” হাসি উত্তরিল
রত্নাকররত্নোত্তমা ইন্দ্রিরা সুন্দরী,—
“ভূতলে পতিত এবে দৈত্যকুলরিপু,
রিপু তব; কিন্তু সাজে রক্ষোবলদলে
লঙ্কেশ, আকুল রাজা প্রতিবিধানিতে
পুত্রবধ! লক্ষ রক্ষঃ সাজে তার সনে।
দিতে এ বারতা, দেব, আইনু এ দেশে।
সাধিল তোমার কর্ম সৌমিত্রি সুমতি;
রক্ষ তারে, আদিত্যে! উপকারী জনে,
মহৎ যে প্রাণ-পণে উদ্ধারে বিপদে!
290 আর কি কহিব, শক্র? অবিদিত নহে
রক্ষঃকুলপ্রাক্রম! দেখ চিন্তা করি

কি উপায়ে, শচীকান্ত, রাখিবে রাখবে।”
উত্তরিলে দেবপতি,— “স্বর্গের উত্তরে,
দেখ চেয়ে, জগদম্বু, অম্বর প্রদেশে;—
সুসজ্জ অম্বরদল। বাহিরিয়া যদি
রণ-আশে মহেশ্বাস রক্ষঃকুলপতি,
সমরিব তার সঙ্গে রঞ্জে, দয়াময়ি।—
না ডরি রাখণে, মাতঃ, রাখণি বিহনে।”

300

বাসবীয় চমু রমা দেখিলা চমকি
স্বর্গের উত্তর ভাগে। যত দূর চলে
দেবদৃষ্টি, দৃষ্টি দানে হেরিলা সুন্দরী
রথ, গজ, অশ্ব, সাদী, নিষাদী, সুরথী,
পদাতিক যমজয়ী, বিজয়ী সমরে।
গন্ধর্ব, কিম্বর, দেব, কালাগ্নি-সদৃশ
তেজে; শিখিধজরথে স্বন্দ তারকারি
সেনানী, বিচিত্র রথে চিত্ররথ রথী।
জ্বলিছে অম্বর যথা বন দাবানলে;
ধুমপুঞ্জসম তাহে শোভে গজরাজী,
শিখারূপে শূলাগ্রামে ভাতিছে ঝলসি
নয়ন! চপলা যেন অচলা, শোভিছে
পতাকা, রবিপরিধি জিনি তেজোগুণে,
ঝকঝকে চর্ম, বর্ম বলে ঝলঝলে।

310

শুধিলা মাধবপ্রিয়া — “কহ দেবনিধি
আদিত্যেয়, কোথা এবে প্রভঞ্জন-আদি
দিক্‌পাল? ত্রিদিবসৈন্য শূন্য কেন হেরি
এ বিরহে?” উত্তরিলে শচীকান্ত বলী;
“নিজ নিজ রাজ্য আজি রক্ষিতে দিক্‌পালে
আদেশিনু, জগদম্বু। দেবরক্ষোরণে,
(দুর্জয় উভয় কুল) কে জানে কি ঘটে?—
হয়ত মজিবে মহী, প্রলয়ে যেমতি,
আজি, এ বিপুল সৃষ্টি যাবে রসাতলে।”

320

আশীষিয়া সুকেশিনী কেশববাসনা
দেবেশে, লঙ্কায় মাতা সঙ্ঘরে ফিরিলা
সুবর্ণ ঘনবাহনে, পশি স্বমন্দিরে,
বিষাদে কমলাসনে বসিলা কমলা,—
আলো করি দশ দিশ রূপের কিরণে,
বিরসবদেন, মরি, রক্ষঃকুলদুঃখে!

রণমদে মত্ত সাজে রক্ষঃকুলপতি,—
হেমকূট-হেমশৃঙ্গ-সমোজ্জ্বল তেজে
চৌদিকে রথীন্দ্রদল! বাজিছে অদূরে
রণবাদ্য, রক্ষোধ্বজ উড়িছে আকাশে।
অসংখ্য রাক্ষসবৃন্দ নাদিছে তুঙ্কারে!
হেন কালে সভাতলে উতরিলা রাণী
মন্দোদরী, শিশুশূন্য নীড় হেরি যথা
আকুলা কপোতী, হায়! ধাইছে পশ্চাতে
সখীদল। রাজপদে পড়িলা মহিষী।

330

যতনে সতীরে তুলি, কহিলা বিষাদে
রক্ষোরাজ, “বাম এবে, রক্ষঃ-কুলেন্দ্রাণি,
আমা দৌহা প্রতি বিধি! তবে সে ঝাঁচিছি
এখনও, সে কেবল প্রতিবিধিৎসিতে
মৃত্যু তার! যাও ফিরি শূন্য ঘরে তুমি;—
রণক্ষেত্রযাত্রী আমি, কেন রোধ মোরে?
বিলাপের কাল, দেবি, চিরকাল পাব!
বৃথা রাজ্যসুখে, সতি, জলাঞ্জলি দিয়া,
বিরলে বসিয়া দৌহে স্বরিব তাহারে
অহরহঃ। যাও ফিরি; কেন নিবাইবে
এ রোষাণি অশ্রুণীরে, রাণি মন্দোদরি?
বনসুশোভন শাল ভূপতিত আজি,
চূর্ণ তুঙ্গতম শৃঙ্গ গিরিবর শিরে;
গগনরতন শশী চিররাহু গ্রাসে।”

350

ধরাধরি করি সখী লইলা দেবীরে
 অবরোধে! ক্রোধভরে বাহিরি, ভৈরবে
 কহিলা রাক্ষসনাথ, সশোধি রাক্ষসে,—
 “দেব-দৈত্য-নর-রণে যার পরাক্রমে
 জয়ী রক্ষঃ-অনীকিনী; যার শরজালে
 কাতর দেবেন্দ্র সহ দেবকুল-রথী;
 অতল পাতালে নাগ, নর নরলোকে;—
 হত সে বীরেশ আজি অন্যায় সমরে,
 360 বীরবৃন্দ! চোরবেশে পশি দেবালয়ে,
 সৌমিত্রি বধিল পুত্রে, নিরস্ত্র সে যবে
 নিভূতে! প্রবাসে যথা মনোদুঃখে মরে
 প্রবাসী, আসন্নকালে না হেরি সম্মুখে
 স্নেহপাত্র তার যত— পিতা, মাতা, ভ্রাতা,
 দয়িতা—মরিল আজি স্বর্ণ-লঙ্কাপুরে,
 স্বর্ণলঙ্কা-অলঙ্কার! বহুকালাবধি
 পালিয়াছি পুত্রসম তোমা সবে আমি;—
 জিজ্ঞাসহ ভূমণ্ডলে, কোন্ বংশখ্যাতি
 রক্ষাবংশখ্যাতিসম? কিন্তু দেব নরে
 370 পরাভাবি, কীর্তিবৃক্ষ রোপিনু জগতে
 বৃথা! নিদারুণ বিধি, এত দিনে এবে
 বামতম মম প্রতি, তেঁই শূখাইল
 জলপূর্ণ আলবাল অকাল নিদাঘে!
 কিন্তু না বিলাপি আমি। কি ফল বিলাপে?
 আর কি পাইব তারে? অশ্রুবারিধারা,
 হয় রে, দ্রবে কি কভু কৃতান্তের হিয়া
 কঠিন? সমরে এবে পশি বিনাশিব
 অধর্মী সৌমিত্রি মুঢ়ে, কপট-সমরী,—
 380 বৃথা যদি রক্ত আজি, আর না ফিরিব—
 পদার্পণ আর নাহি করিব এ পুরে
 এ জন্মে! প্রতিজ্ঞা মম এই, রক্ষোরাথি!
 দেবদৈত্যনরগ্রাস তোমরা সমরে;
 বিশ্বজয়ী, ঋরি তারে, চল রণস্থলে,—

মেঘনাদ হত রণে, এ বারতা শুনি,
 কে চাহে বাঁচিতে আজি এ কর্বুরকূলে,
 কর্বুরকূলের গর্ব মেঘনাদ বলী!”
 নীরবিলা মহেষাস নিশ্বাসি বিষাদে।
 ক্ষোভে রোষে রক্ষঃসৈন্য নাদিল নাঘোষে,
 তিতিয়া মহীরে, মরি, নয়নে-আসারে!
 শুনি সে ভীষণ স্বন নাদিল গভীরে
 390 রঘুসৈন্য। ত্রিদিবেন্দ্র নাদিল ত্রিদিবে!
 রুঘিলা বৈদেহীনাথ, সৌমিত্রিকেশরী,
 সুগ্রীব অঙ্গদ, হনু, নেতৃনিধি যত,
 রক্ষোযম; নল, নীল, শরভ সুমতি,—
 গর্জিল বিকট ঠাট জয় রাম নাদে!
 মন্দিলা জীমূতবৃন্দ আবারি অশ্বরে;
 ইরস্মদে ধাঁধি বিশ্ব, গর্জিল অশনি,
 চামুণ্ডার হাসিরাশিসদৃশ হাসিল
 সৌদামিনী, যবে দেবী হাসি বিনাশিলা
 400 দুর্মদ দানবদলে, মত্ত রণমদে।
 ডুবিল তিমিরপুঞ্জ তিমির-বিনাশী
 দিনমণি, বায়ুদল বহিলা চৌদিকে
 বৈশ্বানরশ্বাসরূপে; জ্বলিল কাননে
 দাবান্নি, প্লাবন নাদি গ্রাসিল সহসা
 পুরী, পল্লী; ভূকম্পনে পড়িল ভূতলে
 অটালিকা, তরুরাজী; জীবন ত্যজিল
 উচ্চ কাঁদি জীবকুল, প্রলয়ে যেমতি!—
 মহাভয়ে ভীতা মহী কাঁদিয়া চলিলা
 বৈকুণ্ঠে। কনকাসনে বিরাজেন যথা
 410 মাধব, প্রণমি সাক্ষী আরাধিলা দেবে;—
 “বারে বারে অধীনীরে, দয়াসিন্ধু তুমি,
 হে রমেশ, তরাইলা বহু মূর্তি ধরি;
 কূর্মপৃষ্ঠে তিষ্ঠাইলা দাসীরে প্রলয়ে
 কূর্মরূপে; বিরাজিনু দশনশিখরে

আমি, (শশাঙ্কের দেহে কলঙ্কের রেখা-
সদৃশী) বরাহমূর্তি ধরিলে যে কালে,
দীনবন্ধু! নরসিংহবেশে বিনাশিয়া
হিরণ্যকশিপু দৈত্যে, জুড়ালে দাসীরে!
খর্ব্বিলা বলির গর্ব্ব খর্ব্বাকারছলে, 450
বামন! বাঁচিনু, প্রভু, তোমার প্রসাদে!
আর কি কহিব, নাথ! পদাশ্রিতা দাসী!
তেঁই পাদপদ্মতলে এ বিপড়িকালে।”

হাসি সুমধুর স্বরে শুধিলা মুরারি,
“কি হেতু কাতরা আজি, কহ জগন্নাথঃ
বসুধে? আয়াসে আজি কে, বৎসে,
তোমারে?”

উত্তরিলে কাঁদি মহী; “কি না তুমি জান,
সর্ব্বজ্ঞ? লঙ্কার পানে দেখ, প্রভু, চাহি।
রণে মত্ত রক্ষসরাজ; রণে মত্ত বলী 460
রাঘবেন্দ্র, রণে মত্ত ত্রিদিবেন্দ্র রথী!
মদকল করিত্রয় আয়াসে দাসীরে!
দেবতাকৃতি রথীপতি সৌমিত্রি কেশরী
বধিলা সংগ্রামে আজি ভীম মেঘনাদে,
আকুল বিষম শোকে রক্ষসকুলনিধি
করিলা প্রতিজ্ঞা, রণে মারিবে লক্ষ্মণে;
করিলা প্রতিজ্ঞা ইন্দ্র রক্ষিতে তাহারে
বীরদর্পে;—অবিলম্বে, হায়, আরম্ভিবে
কাল রণ, পীতাম্বর, স্বর্ণলঙ্কাপুরে
দেব, রক্ষস, নর রোষে। কেমনে সহিব 470
এ ঘোর যাতনা, নাথ, কহ তা আমারে?”

চাহিলা রমেশ হাসি স্বর্ণলঙ্কা পানে।
দেখিলা রক্ষসবল বাহিরিছে দলে
অসংখ্য, প্রতিঘ-অন্ধ, চতুঃস্কন্ধরূপী।
চলিছে প্রতাপ আগে জগত কাঁপায়ে,
পশ্চাতে শব্দ চলে শ্রবণ বধিরি,

চলিছে পরাগ পরে দৃষ্টিপথ রোধি
ঘন ঘনাকাররূপে! টলিছে সঘনে
স্বর্ণলঙ্কা! বহির্ভাগে দেখিলা শ্রীমতী
রঘুসৈন্য, উর্মিকুল সিংধুমুখে যথা
চির-অরি প্রভঞ্জন দেখা দিলে দূরে।
দেখিলা পুন্ডরীকাক্ষ, দেবদল বেগে
ধাইছে লঙ্কার পানে, পক্ষিরাজ যথা
গরুড়, হেরিয়া দূরে সদা-ভক্ষ্য ফণী,
হুঙ্কারে! পুরিছে বিশ্ব গভীর নির্ঘোষে!
পলাইছে যোগীকুল যোগ যাগ ছাড়ি,
কোলে করি শিশুকূলে কাঁদিছে জননী,
ভয়াকুলা; জীবব্রজ ধাইছে চৌদিকে
ছন্মমতি! ক্ষণকাল চিন্তি চিন্তামণি
(যোগীন্দ্র-মানস-হংস) কহিলা মহীরে,-
বিষম বিপদ, সতি, উপস্থিত দেখি
তব পক্ষে! বিরূপাক্ষ, রুদ্রতেজোদানে,
তেজস্বী করিলা আজি রক্ষসকুলরাজে।
না হেরি উপায় কিছু, যাহ তাঁর কাছে,
মেদিনী!” পদারবিন্দে কাঁদি উত্তরিলে
বসুধরা, “হায়, প্রভু, দুরন্ত সংহারী
ত্রিশূলী; সতত রত নিধন সাধনে!
নিরন্তর তমোগুণে পূর্ণ ত্রিপুরারি।
কাল-সর্প-সাধ, সৌরি, সদা দম্বাইতে,
উগরি বিষাগ্নি, জীবে! দয়াসিন্ধু তুমি,
বিশ্বেশ্বর, বিশ্বভার তুমি না বহিলে,
কে আর বহিবে, কহ? বাঁচাও দাসীরে,
হে শ্রীপতি, এ মিনতি ও রাঙা চরণে!”
উত্তরিলে হাসি বিভু, “যাও নিজ স্থলে,
বসুধে; সাধিব কার্য তোমার, সন্ধরি
দেববীর্য। না পারিবে রক্ষিতে লক্ষ্মণে
দেবেন্দ্র, রক্ষসদুঃখে দুঃখী উমাপতি।”

480 মহানন্দে বসুন্ধরা গেলা নিজ স্থলে।
কহিলা গরুড়ে প্রভু, “উড়ি নভোদেশে,
গরুত্মান, দেবতেজঃ হর আজি রণে,
হরে অমুরাশি যথা তিমিরারি রবি;
কিংবা তুমি, বৈনতেয়, হরিলা যেমতি
অমৃত। নিস্তেজ দেবে আমার আদেশে।”

বিস্তারি বিশাল পক্ষ, উড়িলা আকাশে
পক্ষিরাজ; মহাছায়া পড়িল ভূতলে,
আঁধারি অযুত বন, গিরি, নদ, নদী।

490 যথা গৃহমাঝে বহি জ্বলিলে উত্তেজে,
গবাক্ষ-দুয়ার-পথে বাহিরিয়া বেগে
শিখাপুঞ্জ, বাহিরিল চারি দ্বার দিয়া
রাক্ষস, নিনাদি রোষে; গর্জিল চৌদিকে
রঘুসৈন্য; দেববৃন্দ পশিলা সমরে।

আইলা মাতঙ্গবর ঐরাবত, মাতি
রণরঞ্জে; পৃষ্ঠদেশে দস্তোলিনিক্ষেপী
সহস্রাক্ষ, দীপ্যমান মেরুশৃঙ্গ যথা
রবিকরে, কিম্বা ভানু মধ্যাহ্নে; আইলা
শিখিধ্বজ রথে রথী স্কন্দ তারকারি
সেনানী; বিচিত্র রথে চিত্ররথ রথী;
কিন্নর, গন্ধর্ব, যক্ষ, বিবিধ বাহনে!
আতঙ্কে শূন্যিলা লক্ষা স্বর্গীয় বাজনা;
কাঁপিল চমকি দেশ অমর-নিনাদে।

500 সান্ধ্যাঙ্গে প্রণমি ইন্দ্রে কহিলা নৃমণি,—
“দেবকুলদাস দাস, দেবকুলপতি!
কত সে করিনু পুণ্য পূর্বজন্মে আমি,
কি আর কহিব তার? তেঁই সে লভিনু
পদাশ্রয় আজি তব এ বিপত্তি-কালে,
বজ্রপাণি! তেঁই আজি চরণ-পরশে
পবিত্রিলা ভূমণ্ডল ত্রিদিবনিবাসী?”

510 উত্তরিলা স্বরীশ্বর সম্ভাষি রাঘবে,—
“দেবকুলপ্রিয় তুমি, রঘুকুলমণি!
উঠি দেবরথে, রথি, নাশ বাহুবলে
রাক্ষস অধর্মচারী। নিজ কর্মদোষে
মজে রক্ষঃকুলনিধি; কে রক্ষিবে তারে?
লভিনু অমৃত যথা মথি জলদলে,
লঙ্কভাঙি লঙ্কা আজি, দণ্ডি নিশাচরে,
সান্ধী মৈথিলীরে, শূর, অর্পিবে তোমারে
দেবকুল! কত কাল অতল সলিলে
বসিবেন আর রমা, আঁধারি জগতে?”

520 বাজিল তুমুল রণ দেবরক্ষ্মানরে।
অমুরাশিসম কষু ঘোষিল চৌদিকে
অযুত; টঙ্কারি ধনুঃ ধনুর্ধর বলী
রোধিলা শ্রবণপথ! গগন ছাইয়া
উড়িল কলঙ্ককুল, ইরম্মদতেজে
ভেদি বর্ম, চর্ম, দেহ, বহিল প্লাবনে
শোণিত! পড়িল রক্ষ্মানরকুলরথী,
পড়িল কুঞ্জরপুঞ্জ, নিকুঞ্জে যেমতি
পত্র প্রভঞ্জনবলে, পড়িল নিনাদি
বাজীরাজী, রণভূমি পুরিল ভৈরবে।

530 আক্রমিলা সুরবৃন্দে চতুরঞ্জ বলে
চামর—অমরত্রাস। চিত্ররথ রথী
সৌরতেজঃ রথে শূর পশিলা সংগ্রামে,
বারণারি সিংহ যথা হেরি সে বারণে।
আহ্লানিল ভীম রবে সুগ্রীবে উদগ্র
রথীশ্বর; রথচক্র ঘুরিল ঘর্ঘরে
শতজলস্রোতোনাদে। চালাইলা বেগে
বাস্কল মাতঙ্গযুথে, যুথনাথ যথা
দুর্বার, হেরিয়া দূরে অঙ্গদে; রুষিলা
যুবরাজ, রোষে যথা সিংহশিশু হেরি
মৃগদলে! অসিলোমা, তীক্ষ্ণ অসি করে,
বাজীরাজি সহ ক্রোধে বেড়িল শরভে

বীরর্ষভ। বিড়ালান্ধ (বিরূপান্ধ যথা
 540 সর্বনাশী) হনু সহ আরঙিলা কোপে
 সংগ্রাম। পশিলা রণে দিব্য রথে রথী
 রাঘব, দ্বিতীয়, আহা, স্বরীশ্বর যথা
 বজ্রধর! শিখিধ্বজ স্বন্দ তারকারি,
 সুন্দর লক্ষ্মণ শুরে দেখিলা বিস্ময়ে
 নিজপ্রতিমূর্তি মর্ত্যে। উড়িল চৌদিকে
 ঘনরূপে রেণুরাশি, টলটল টলে
 টলিলা কনক-লঙ্কা, গর্জিলা জলধি।
 সৃজিলা অপূর্ব ব্যুহ শচীকান্ত বলী।
 বাহিরিলা রক্ষোরাজ পুষ্পক-আরোহী,
 550 ঘর্ঘরিলা রথচক্র নির্ঘোষে, উগরি
 বিস্ফুলিঙ্গ; তুরঙ্গম হেঘিল উল্লাসে।
 রতনসম্ভবা বিভা, নয়ন ঝাঁপিয়া,
 ধায় অগ্রে, উষা যথা, একচক্র রথে
 উদেন আদিত্য যবে উদয়-অচলে!
 নাদিল গম্ভীরে রক্ষঃ হেরি রক্ষোনাথে।
 সম্ভাষি সারথিবরে, কহিলা সুরথী,—
 “নাহি যুঝে নর আজি, হে সূত, একাকী,
 দেখ চেয়ে! ধূমপুঞ্জে অগ্নিরাশি যথা,
 560 শোভে অসুরারিদল রঘুসৈন্য মাঝে।
 আইলা লঙ্কায় ইন্দ্র শূনি হত রণে
 ইন্দ্রজিত!” ঝরি পুত্রে রক্ষঃকুলনিধি,
 সরোষে গর্জিয়া রাজা কহিলা গভীরে,
 “চালাও, হে সূত, রথ যথা বজ্রপাণি
 বাসব।” চলিল রথ মনোরথগতি।
 পালাইল রঘুসৈন্য, পালায় যেমনি
 মদকল করিরাজে হেরি, উর্ধ্বশ্বাসে
 বনবাসী! কিম্বা যথা ভীমাকৃতি ঘন,
 বজ্র-অগ্নিপূর্ণ, যবে উড়ে বায়ুপথে
 600 ঘোর নাদে, পশুপক্ষী পালায় চৌদিকে
 অতঙ্কে! টঙ্কারি ধনুঃ, তীক্ষ্ণতর শরে

মুহূর্তে ভেদিলা ব্যুহ বীরেন্দ্র-কেশরী,
 সহজে প্লাবন যথা ভাঙে ভীমাঘাতে
 বালিবন্ধ! কিম্বা যথা ব্যাঘ্র নিশাকালে
 গোষ্ঠবৃতি! অগ্রসরি শিখিধ্বজ রথে,
 শিঞ্জিনী আকর্ষি রোষে তারকারি বলী
 রোধিলা সে রথগতি। কৃতাজলিপুটে
 নমি শুরে লঙ্কেশ্বর কহিলা গম্ভীরে,—
 “শঙ্করী শঙ্করে, দেব, পূজে দিবানিশি
 কিঙ্কর! লঙ্কায় তবে বৈরীদল মাঝে
 580 কেন আজি হেরি তোমা? নরাধম রামে
 হেন আনুকূল্য দান কর কি কারণে,
 কুমার? রথীন্দ্র তুমি; অন্যায় সমরে
 মারিল নন্দনে মোর লক্ষ্মণ, মারিব
 কপটসমরী মুঢ়ে; দেহ পথ ছাড়ি!”
 কহিলা পার্বতীপুত্র, “রক্ষিব লক্ষ্মণে,
 রক্ষোরাজ, আজি আমি দেবরাজাদেশে,
 বাহুবলে, বাহুবল, বিমুখ আমারে,
 নতুবা এ মনোরথ নারিবে পূর্ণিতে!”
 সরোষে, তেজস্বী আজি মহারুদ্রতেজে,
 590 হুঙ্কারি হানিল অস্ত্র রক্ষঃকুলনিধি
 অগ্নিসম, শরজালে কাতরিয়া রণে
 শক্তিধরে! বিজয়ারে সম্ভাষি অভয়া
 কহিলা, “দেখ্ লো, সখি, চাহি লঙ্কা পানে,
 তীক্ষ্ণ শরে রক্ষেশ্বর বিঁধিছে কুমারে
 নির্দয়! আকাশে দেখ্, পক্ষীন্দ্র হরিছে—
 দেবতেজঃ, যা লো তুই সৌদামিনীগতি,
 নিবার্ কুমারে, সই। বিদরিছে হিয়া
 আমার, লো সহচরি, হেরি রক্তধারা
 বাছার কোমল দেহে। ভকতবৎসল
 600 সদানন্দ, পুত্রাধিক স্নেহেন ভকতে;
 তেঁই সে রাবণ এবে দুর্বর সমরে,
 স্বজনি!” চলিলা আশু সৌরকররূপে

নীলাশ্বরপথে দূতী। সন্মোখি কুমারে
 বিধুমুখী, কর্ণমূলে কহিলা— “সম্বর
 অস্ত্র তব, শক্তিধর, শক্তির আদেশে।
 মহারুদ্ধতেজে আজি পূর্ণ লক্ষ্যপতি!”
 ফিরাইলা রথ হাসি স্বন্দ তারকারি
 মহাসুর। সিংহনাদে কটক কাটিয়া
 অসংখ্য, রাক্ষসনাথ ধাইলা সম্বরে
 ঐরাবত-পৃষ্ঠে যথা দেব বজ্রপাণি।

610

বেড়িল গন্ধর্ব নর শত প্রসরণে
 রক্ষেন্দ্রে; হুঙ্কারি শূর নিরস্ত্রিলা সবে
 নিমিষে, কালাগ্নি যথা ভস্মে বনরাজী।
 পালাইলা বীরদল জলাঞ্জলি দিয়া
 লঙ্কায়! আইলা রোষে দৈত্যকুল-অরি,
 হেরি পার্শ্বে কর্ণ যথা কুরুক্ষেত্ররণে।
 ভীষণ তোমর রক্ষঃ হানিলা হুঙ্কারি
 ঐরাবতশিরঃ লক্ষি। অর্ধপথে তাহে
 শর বৃষ্টি স্বরীশ্বর কাটিলা সম্বরে।

620

কহিলা কর্বরপতি গর্বে সুরনাথে;—
 “যার ভয়ে বৈজয়ন্তে, শচীকান্ত বলি,
 চির কম্পবান্ তুমি, হত সে রাবণি,
 তোমার কৌশলে, আজি কপট সংগ্রামে!
 তেঁই বৃষ্টি আসিয়াছ। লক্ষ্যপুরে তুমি,
 নির্লঙ্ক! অবধ্য তুমি, অমর; নহিলে
 দমনে শমন যথা, দমিতাম তোমা
 মুহূর্তে! নারিবে তুমি রক্ষিতে লক্ষ্মণে,
 এ মম প্রতিজ্ঞা, দেব!” ভীম গদা ধরি,
 লক্ষ্য দিয়া রথীশ্বর পড়িলা ভূতলে,
 সঘনে কাঁপিলা মহী পদযুগভরে,

630

উড়ুদেশে কোষে অসি বাজিল ঝন্ঝনি!

হুঙ্কারি কুলিশী রোষে ধরিল কুলিশে!
 অমনি হরিল তেজঃ গরুড়; নারিলা
 লাড়িতে দম্ভোলি দেব দম্ভোলিনিষ্ফেপী!
 প্রহারিলা ভীম গদা গজরাজশিরে
 রক্ষেরাজ, প্রভঞ্জন যেমতি, উপাড়ি
 অভভেদী মহীরুহ, হানে গিরিশিরে।
 ঝড়ে! ভীমাঘাতে হস্তী নিরস্ত্র, পড়িলা
 হাঁটু গাড়ি। হাসি রক্ষঃ উঠিলা স্বরথে।
 যোগাইলা মুহূর্তেকে মাতলি সারথি
 সুরথ; ছাড়িলা পথ দিতিসুতরিপু
 অভিমানে। হাতে ধনুঃ, ঘোর সিংহনাদে
 দিব্য রথে দাশরথি পশিলা সংগ্রামে।

640

কহিলা রাক্ষসপতি, “না চাহি তোমারে
 আজি, হে বৈদেহীনাথ। এ ভবমন্ডলে
 আর এক দিন তুমি জীব নিরাপদে!
 কোথা সে অনুজ তব কপটসমরী
 পামর? মারিব তারে, যাও ফিরি তুমি
 শিবিরে, রাঘবশ্রেষ্ঠ!” নাদিলা ভৈরবে
 মহেষ্মাস, দূরে শূর হেরি রামানুজে।
 বৃষপালে সিংহ যথা, নাশিছে রাক্ষসে
 শুরেন্দ্র; কভু বা রথে, কভু বা ভূতলে।

650

চলিল পুষ্পক বেগে ঘর্ঘরি নির্ঘোষে;
 অগ্নিচক্র-সম চক্র বর্ষিল চৌদিকে
 অগ্নিরাশি, ধূমকেতু-সদৃশ শোভিল
 রথচুড়ে, রাজকেতু! যথা হেরি দূরে
 কপোত, বিস্তারি পাখা, ধায় বাজপতি
 অম্বরে; চলিলা রক্ষঃ, হেরি রণভূমে
 পুত্রহা সৌমিত্রি শুরে; ধাইলা চৌদিকে
 হুহুঙ্কারে দেব নর রক্ষিতে শুরেশে।
 ধাইলা রাক্ষসবৃন্দ হেরি রক্ষানাথে।

660

বিড়ালান্ধ রক্ষঃশুরে বিমুখি সংগ্রামে।
আইলা অঙ্কনাপুত্র,— প্রভঞ্জনসম
ভীমপরাক্রম হনু, গর্জি ভীমনাদে।

যথা প্রভঞ্জনবলে উড়ে তুলারান্ধি
চৌদিকে; রাক্ষসবৃন্দ পালাইলা রড়ে
হেরি যমাকৃতি বীরে। রুষি লক্ষ্যপতি
চোক্ চোক্ শরে শুর অস্থিরিলা শুরে।

অধীর হইলা হনু, ভূধর যেমতি
ভুকম্পনে! পিতৃপদ স্মরিলা বিপদে
বীরেন্দ্র, আনন্দে বায়ু নিজ বল দিলা
নন্দনে, মিহির যথা নিজ করদানে
ভুষেন কুমুদবাঙ্গা সুধাংশুনিধিরে।
কিন্তু মহারুদ্ধতেজে তেজস্বী সুরথী
নৈকেষয়, নিবারিলা পবনতনয়ে,—
ভঙ্গ দিয়া রণরঞ্জে পালাইলা হনু।

আইলা কিষ্কিন্ধ্যাপতি, বিনাশি সংগ্রামে
উদগ্রে বিগ্রহপ্রিয়া। হাসিয়া কহিলা
লক্ষ্যানাথ,—“রাজ্যভোগ ত্যজি কি কুম্ভণে,
বর্বর, আইলি তুই এ কনকপুরে?

ভ্রাতৃবধু তারা তোর তারাকারা রূপে;
তারে ছাড়ি কেন হেথা রথীকুল মাঝে
তুই, রে কিষ্কিন্ধ্যানাথ? ছাড়ি, যা চলি
স্বদেশে! বিধবাদশা কেন ঘটাইবি

আবার তাহার, মূঢ়? দেবর কে আছে
আর তার?” ভীম রবে উত্তরিলা বলী
সুগ্রীব,—“অধর্মাচারী কে আছে জগতে
তোর সম, রক্ষো রাজ? পরদারালোভে
সবংশে মজিলি, দুষ্ক? রক্ষঃকুলকালি
তুই, রক্ষঃ! মৃত্যু তোর আজি মোর হাতে!
উদ্ধারিব মিত্রবধু বধি আজি তোরে!”

এতেক কহিয়া বলী গর্জি নিক্ষিপিলা
গিরিশৃঙ্গ। অনন্তর আঁধারি ধাইল
শিখর, সুতীক্ষ্ণ শরে কাটিলা সুরথী
রক্ষো রাজ, খান খান করি সে শিখরে,
টঙ্কারি কোদণ্ড পুনঃ রক্ষঃ-চূড়ামণি
তীক্ষ্ণতম শরে শুর বিধিলা সুগ্রীবে
হুঙ্কারে! বিষমাঘাতে ব্যথিত সুমতি,
পালাইলা; পালাইলা সত্রাসে চৌদিকে
রঘুসৈন্য, (জল যথা জাঙাল ভাঙিলে
কোলাহলে); দেবদল, তেজোহীন এবে,
পালাইলা নর সহ, ধুম সহ যথা
যায় উড়ি অগ্নিকণা বহিলে প্রবলে
পবন! সম্মুখে রক্ষঃ হেরিলা লক্ষ্মণে
দেবাকৃতি! বীরমদে দুর্মদ সমরে
রাবণ, নাদিলা বলী হুঙ্কার রবে;—
নাদিলা সৌমিত্রি শুর নির্ভয় হৃদয়ে,
নাদে যথা মত্ত করী মত্তকরিনাদে!
দেবদত্ত ধনুঃ ধনী টঙ্কারিলা রোষে।
“এত ক্ষণে, রে লক্ষ্মণ”— কহিলা সরোষে
রাবণ, “এ রণক্ষেত্রে পাইনু কি তোরে,
নরাদম? কোথা এবে দেব বজ্রপাণি?
শিখিধ্বজ শক্তিধর? রঘুকুলপতি,
ভ্রাতা তোর? কোথা রাজা সুগ্রীব? কে তোরে
রক্ষিবে পামর, আজি? এ আসন্ন কালে
সুমিত্রা জননী তোর, কলত্র উর্মিলা,
ভাব দৌহে! মাংস তোর মাংসাহারী জীবে
দিব এবে, রক্তস্রোতঃ শুষিবে ধরণী!
কুম্ভণে সাগর পার হইলি, দুর্মতি,
পশিলি রাক্ষসালয়ে চোরবেশ ধরি,
হরিলি রাক্ষসরত্ন-অমূল্য জগতে।”

গর্জিলা ভৈরবে রাজা বসাইয়া চাপে
অগ্নিশিখাসম শর; ভীম সিংহনাদে
উত্তরিল ভীমনাদী সৌমিত্রিকেশরী,—
“ক্ষত্রকূলে জন্ম মম, রক্ষঃকুলপতি,
নাহি ডরি যমে আমি; কেন ডরাইব
তোমায়? আকুল তুমি পুত্রশোকে আজি,
যথা সাধ্য কর, রথি; আশু নিবারিব
শোক তব, প্রেরি তোমা পুত্রবর যথা!”

730

বাজিল তুমুল রণ; চাহিলা বিশ্বয়ে
দেব নর দৌঁহা, পানে; কাটিলা সৌমিত্রি
শরজাল মুহূর্মুহুঃ হুহুঙ্কার রবে।
সবিশ্বয়ে রক্ষো রাজ কহিলা, “বাখানি
বীরপনা তোর আমি, সৌমিত্রিকেশরী!
শক্তিধরাধিক শক্তি ধরিস সুরথী,
তুই; কিছু নাহি রক্ষা আজি মোর হাতে।

760

স্মরি পুত্রবরে শূর, হানিলা সরোষে
মহাশক্তি। বজ্রনাদে উঠিলা গর্জিয়া,
উজ্জ্বলি অম্বরদেশ সৌদামিনীরূপে,
ভীষণরিপুনাশিনী! কাঁপিলা সভয়ে
দেব, নর! ভীমাঘাতে পড়িল ভূতলে
লক্ষ্মণ, নক্ষত্র যথা, বাজিল ঝন্ঝনি
দেব-অস্ত্র, রক্তস্রোতে আভাহীন এবে।
সপক্ষগ গিরিসম পড়িলা সুমতি।

770

গহন কাননে যথা বিঁধি মৃগবরে
কিরাত অব্যর্থ শরে, ধায় দ্রুতগতি
তার পানে; রথ ত্যজি রক্ষো রাজ বলী
ধাইল ধরিতে শবে! উঠিল চৌদিকে
আর্তনাদ! হাহাকারে দেবনররথী
বেড়িলা সৌমিত্রি শুরে। কৈলাসসদনে
শঙ্করের পদতলে কহিলা শঙ্করী,—
“মারিল লক্ষ্মণে, প্রভু, রক্ষঃকুলপতি

750

সংগ্রামে! ধূলায় পড়ি যায় গড়াগড়ি
সুমিত্রানন্দন এবে! তুঘিলা রক্ষসে,
ভকত-বৎসল তুমি; লাঘবিলা রণে
বাসবের বীরগর্ব; কিছু ভিক্ষা করি,
বিরূপাক্ষ, রক্ষ, নাথ, লক্ষ্মণের দেহে!”
হাসিয়া কহিলা শূলী বীরভদ্র শুরে—
“নিবার লঙ্কেশে, বীর!” মনোরথ-গতি,
রাবণের কর্ণমূলে কহিলা গম্ভীরে
বীরভদ্র; “যাও ফিরি স্বর্ণলঙ্কাধামে,
রক্ষো রাজ! হত রিপু, কি কাজ সমরে?”
স্বপ্নসম দেবদূত অদৃশ্য হইলা।
সিংহনাদে শূরসিংহ আরোহিলা রথে;
বাজিলা রক্ষস-বাদ্য, নাদিল গম্ভীরে
রক্ষস; পশিলা পুরে রক্ষঃ-অনীকিনী—
রণবিজয়িনী ভীমা, চামুণ্ডা যেমতি
রক্তবীজে নাশি দেবী, তাণ্ডবি উল্লাসে,
অটহাসি রক্তাধরে, ফিরিলা নিনাদি,
রক্তস্রোতে আর্দ্রদেহ! দেবদল মিলি
স্বুতিলা সতীরে যথা, আনন্দে বন্দিলা
বন্দীবৃন্দ রক্ষঃসেনা, বিজয়সংগীতে!
হেথা পরাভূত যুদ্ধে, মহা-অভিমনে
সুরদলে সুরপতি গেলা সুরপুরে।

ইতি শ্রীমেঘনাদবধে কাব্যে শক্তির্নির্ভেদো নাম
সপ্তমঃ সর্গঃ।

বাংলা থেকে রোমান হরফ, কাগজে:



অমিতা ভট্টাচার্য্য

কাগজ থেকে হার্ড-ডিস্ক



সংযুক্তা কাঁহার

<http://www.iopb.res.in/~somen/madhu.html>
[email:somen@iopb.res.in](mailto:somen@iopb.res.in)